



**P R I M E
M I N I S T E R**

**Diskursu Sua-exelénsia Primeiru-Ministru, Kay Rala Xanana
Gusmão iha Lansamentu Futuru Lider Timor-Leste nian ba
ASEAN (FLBA)**

**Salaun Multiuzu
GMNTV, Ioron 3 fulan-
abril tinan 2024**



Ho laran-kmanek tebes ha'u hato'o boazvindas ba ita boot sira iha lansamentu Programa Futuru Lider Timor-Leste nian ba ASEAN.

Ami sente onradu hodi hamutuk ho ami, iha dadeer-saan ida-ne'e, Sua-Exelénsia Sekretáriu-Jerál ASEAN, Dr. Kao Kim Hourn.

Ami agradese ho ita-boot nia vizita ne'e, hanesan demonstrasaun/prova apoiu ASEAN nian ba Timor-Leste ninia perkursu hodi adere ba ASEAN.

Obrigadu barak tanba hamutuk ona ho ami, no tanba ita-boot nia orientasaun no mós hanoin sira.

Permite mós ha'u hodi hato'o ha'u-nia rekoñesimentu ba membrus Governu, amigos Korpu Diplomátiku, representantes husi setór privadu, ajénsia internasionál sira, sociedade sivíl no ba mundu akadémiku.

Ha'u mós hakarak hato'o ha'u-nia rekoñesimentu no parabéns ba participantes hosi grupu dahuluk iha Programa Futuru Lider Timor-Leste nian ba ASEAN.

Imi-nia selesaun ba programa ida-ne'e hanesan investimentu ida ba imi-nia futuru, no ba futuru ita-nia nasaun.

Atu dezenvolve jersaun lideres tuirmai ne'e importante tebes ba nasaun ne'ebé de'it.

Ida ne'e nesesária tebes ba Timor-Leste, tanba ne'e, daudaun ne'e ita hahú hela preparativus finál hodi adere ba ASEAN.

Programa ida-ne'e hanesan sinál ida husi ita-nia kompromisu ba integrasaun no kooperasaun rejionál nomós marka pasu significativu ida iha ita-nia luta ba dezenvolvimentu nasional.

Dezenvolvimentu Timor-Leste nian depende tebes ba ita-nia rekursus umanus no kapasitasaun ba ita-nia potenciál umanu.

Tanba ne'e maka ami investe hela ba jersaun lideres tuirmai.



Governu Konstitusionál IX identifika ona katak dezvoltimentu umanu no kapitál sosiál hanesan áreas prioritária ba investimentu, hamutuk ho diversifikasaun ekonómika, dezvoltimentu infraestrutura no boa governasaun.

Ami fiar katak ami-nia adezaun ba ASEAN sei reforsa prioridade hirak-ne'e.

Timor-Leste nu'udar Nasaun joven ida ho potenciál ne'ebé maka seidak esplora.

Ita-nia joven sira, inklui futuru lideres ne'ebé marka prezensa iha-ne'e sei dezempeña papél ida importante tebes hodi aselera ita-nia progresu.

Ami komprometidu hodi kria oportunidades ne'ebé bele fó dalan ba joven sira hodi dezvoltolve sira-nia potenciál.

No ami foti medida konkretas.

Orsamentu ba tinan ida-ne'e aumenta ona finansiamentu ba setor edukasaun hodi nune'e ita bele hadi'a liután qualidade edukasaun iha nivel hotu-hotu.

Fundu Dezvoltimentu Kapitál Umanu, harii iha tinan 2011, kontinua finansia edukasaun no formasaun profisionál bazeia ba área sira ne'ebé nesedita tebes.

Ami fiar katak investimentu ba futuru lideres sei ajuda ami-nia nasaun hodi hasoru dezafiu globál sira ho di'ak-liu, nune'e mós promove inovasaun no kontribui ba futuru ida ne'ebé sustentavel no prósperu.

Programa Futuru Lider ba ASEAN hanesan forma ida atu ita investe ba ita-nia lideransa, tuir ita-nia esforsu hodi hetan integrasaun ida ne'ebé boot tebes iha ita-nia rejiaun.

Señór no señora sira



Ba futuru lider na'in-100 ne'ebé ohin iha-ne'e, ha'u dezeja atu imi-nia programa lideransa ne'e hetan susesu no iha envolvimentu ida ne'ebé iha benefísiu tebes ho ita-nia nasaun viziñu sira iha ASEAN.

Ami fiar katak, imi sei fahe benefísiu sira husi imi-nia esperiénsia iha programa ne'e ho imi-nia kolega sira iha Timor-Leste no iha imi-nia futuru funsaun lideransa nian ho ita-nia parseiru sira husi ASEAN.

Parabéns no boa sorte.

Obrigadu barak

Kay Rala Xanana Gusmão

